

## SANTISSIME TRINITĂT

### Antifone di jentrade

**B**enedet Diu Pari,  
e l'unigjenit Fi di Diu  
e il Spirtu Sant:  
parcè che grant al è stât il so boncûr par nô.

Si dñs Glorie a Diu.

### Colete

Diu, che mandant tal mont  
il Verbo di veretât e il Spirt di santitât  
tu âs rivelât ai oms il to misteri maraveôs,  
danus la gracie che, professant la vere fede,  
o podìn ricognossi la glorie de eterne Trinitât  
e adorâ l'Unitât te potence de maiestât.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Dt 4,32-34.39-40

Il Signôr al è Diu lassù adalt tal cîl compagn di cajù su la tiere; lui e nissun altri.

Dal libri dal Deuteronomi

Mosè al fevelà al popul disint: «Domande mo i timps par vieri, ch'a son stâts prin di te, de di che Diu al à creât l'om su la tiere: di un cjaveç al altri dal cîl ese mai stade une peraule tant grande? Si aial mai sintût alc di sorte? Esal mai un popul ch'al vedi sintude la vôs dal Diu vîf ch'al fevelave tal mieç dal fûc, come che tu le âs sintude tu, e ch'al sedi restât in vite? Là esal mo un diu ch'al va a cirîsi une gjernazie framieç di un'altre, midiant di provis, di spiêi, di meracui e di lotis, cun man fuerte e braç tindût e cun grançj spavents – dutis robis che il Signôr vuestri Diu al à fat par vualtris sot dai vuestris vôi ventijù pal Egjit?. Vuê alore rinditi cont di chest e rumiilu tal to cûr: il Signôr al è Diu lassù adalt tal cîl compagn di cajù su la tiere; lui e nissun altri. Ten cont des sôs leçs e dai siei comants che vuê ti à ordenât, par che tu vedis, tu e i tiei fîs daûr di te, furtune e vite lungje su la tiere che il Signôr to Diu ti da par simpri».

Peraule di Diu.

### SALM RESPONSORIÂL dal Sal 32

**R.** Furtunât il popul ch'al è dal Signôr.

La peraule dal Signôr e je juste  
e fedele ogni sô vore.  
Lui al ten pe onestât e pe dretece;  
dal boncûr dal Signôr e je incolme la tiere. **R.**

Cu la peraule dal Signôr a son stâts fats i cîi  
e dut il lôr furniment cu la soflade de sô bocje,  
parcè che dut al fo fat pe sô peraule,  
al è saltât fûr par un so ordin. **R.**

Ve, il voli dal Signôr si poe sun chei che lu rispjetin,  
sun chei che tal so boncûr a sperin,  
par sfrancjâ de muart lis lôr vitis,  
par tignîju in vite in timp di miserie. **R.**

Viers dal Signôr e brame la nestre anime:  
al è lui nestri scût e nestri jutori.  
Ch'al sedi sore di nô, Signôr, il to boncûr,  
parcè che dome sun te o stin fidâts. **R.**

### **SECONDE LETURE Rm 8,14-17**

**O vês cjàpât il spirt di fîs di anime e midiant di lui o berlin: Abà, Pari!**

De letare di san Pauli apuestul ai Romans

Fradis, duçj chei che si fasin guidâ dal Spirt di Diu, chei li a son fîs di Diu. Di fat no vês cjàpât un spirt di sotanance, in mût di scugnî tornâ a vivi inte pôre, ma o vês cjàpât il spirt di fîs di anime e midiant di lui o berlin: «Abà, Pari!». Ancje il Spirt al testimonie al nestri spirt che nô o sin fîs di Diu. Se o sin fîs, o sin ancje erêts, erêts di Diu, erêts insieme cun Crist, dal moment che, se o patìn cun lui, al è par che o podìn jessi glorificâts insieme cun lui.

Peraule di Diu.

### **CJANT AL VANZELI cf. Ap 1,8**

**R.** Aleluia, aleluia.

Glorie al Pari, al Fi, al Spirtu Sant:  
a Diu ch'al è, ch'al jere e ch'al ven.

**R.** Aleluia.

### **VANZELI Mt 28,16-20**

**Batiant dutis lis nazions tal non dal Pari e dal Fi e dal Spirtu Sant.**

Dal vanzeli seont Matieu

In chê volte, i undis dissepui a lerin in Galilee, su la mont, tal lûc che ur veve dit Gjesù. Viodintlu lu adorarin; cualchidun però al veve ancjemò dubits. Alore Gjesù ur fevelà disint: «Mi è stât dât ogni podê in cîl e su la tiere. Lait duncje, inscuelait dutis lis nazions, batiantlis tal non dal Pari e dal Fi e dal Spirtu Sant, insegnantjur a meti in pratiche dut ce che jo us ai ordenât. E ve che jo o soi cun vualtris duçj i dîs, fint a la fin dal mont».

Peraule dal Signôr.

**Si dîs** O crôt.

### **Su lis ufiertis**

Santifiche, Signôr nestri Diu,  
pe invocazion dal to non chescj regâi de nestre suditançe  
e midiant di lôr fasinus diventâ ancje nô une ufierte eterne.  
Par Crist nestri Signôr.

### **Antifone a la comunion Ga 4,6**

Dal moment ch'o sês fîs,  
Diu al à mandât il Spirt di so Fi tai vuestris cûrs,  
Spirt ch'al berle: Abà, Pari.

### **Daspò de comunion**

Ch'a zovin, Signôr nestri Diu,  
pe salût dal cuarp e da l'anime,  
chest sacrament ch'o vin ricevût,  
e la profession de nestre fede te eterne Trinitât  
e te sô indivisibil Unitât.  
Par Crist nestri Signôr.

Te liturgjie aquileiese e vignive celebrade te ultime domenie dal an liturgjic.